

AVP ta denuncia:

MEP TIN TUR CULPA CU AWE E PROYECTO DI RACE-TRACK LO BAY CURAÇAO

ORANJESTAD (AAN): Segun un comunicado di AVP, nan ta haya masha straño pa mira e asombro di MEP ora cu bisanan nan berdanan, pasobra si tur hende por corda bon e accionnan di Lider Nelson Oduber y partidarianan Rudy Croes, Nilo Swean y Marisol Tromp

durante e accionnan di aña pasa nan mester por realiza cu ta esakinan ta loke a causa cu awe e proyecto aki casi sigur ta bay Curaçao.

E compania no a haya miedo di inverti den San Nicolas y Aruba pa motibo di e proceso di gobernacion sino mas bien pa motibo di e

problema cu oposicion a crea dor di nan rol grandi den tur e accion cu a hera conduci na un destruccion completo di e economia di Aruba cu ta depende tanto di turismo.

E desaroyadornan no ta bay, pasobra cu supuestamente no tin transparencia of pasobra cu Centrale Bank a bisa algo of pasobra CAD a bisa algo. No nan no ta bay pa ningun di e motibonan aki, pasobra a sinta na mesa y busca solucion pa nan.

E proyecto di racetrack ta bayendo pa e simple motibo cu despues di tur e bonchincha cu MEP a ocasiona a haci cu e desaroyadornan no ta sinti nan mes sigur mas si Aruba kier e proyecto aki ainda.

MEP atrobe a demostra cu e no kier pa San Nicolas bay dilanti. Pa kico nan no kier ta nan so lo sa.

Aña pasa durante e accionnan di Aruba Dushi Tera ta Nel cu Rudy a core sali pafor y tira

curpa riba caya. Ta Nel ta esun cu a grita cu e ta bay pone Aruba plat. Ta Nel ta esun cu a haci tur e accion hunto cu e sindicatonan pa logra su meta personal di tumba e Gobierno. Esakinan ta e accionnan cu awe ta haci cu e desaroyadornan a haya miedo di inverti nan placa aki na Aruba.

Durante e accionnan aki ta MEP cu su compinchinan ta esunnan cu a menaza pueblo cu scuridad. Ta MEP cu su compinchinan ta esunnan cu a menaza di laga e pueblo sin awa, sin telefon sin importa e consecucionan cu esaki por tabata tin pa Aruba su futuro economico cu ta depende grandemente riba turismo.

Awor MEP kier bin bisa cu nan no tin culpa cu e proyecto aki no ta bin Aruba mas. Awor nan kier cana pecho na laira grita na tur cuater biento cu nan ta un partido serio. Si nan tabata un partido serio

di con nan a busca di destrui e futuro di Aruba pa metanan personal di venganza? Con nan a defende pueblo ora cu coriente a bay?

Awor cu e proyecto aki no ta bin mas pa San Nicolas kico nan por duna e pueblo aki na su lugar pa sigura un desaroyio socio-economico positivo?

E hipocrecia di partido MEP no tin fin, pasobra ta parce cu no tabata basta cu nan a kita futuro for di e pueblo di San Nicolas, nan ta sigui cu nan menazanan di baha Gobierno y nan lo sigui purba sin preocupa nan mes cu e consecucionan cu esaki por tin pa Aruba.

Partido MEP no solamente kier busca destruccion di nan oponentenan, nan ta buscando destruccion di un pais cu a traha duro pa yega na loke e tin awe. Anto awe nan kier selama cu nan no tin culpa. Pero si nos mira e hechonan e ta bon cla cu MEP TIN TUR E CULPA.

COALICION OLA/AVP LO HACI SU MAXIMO ESFUERZO PA RACE-TRACK KEDA ARUBA

ORANJESTAD(AAN) Lider di partido OLA señor Glenbert Croes kende ta esun cu ta laga su voz resona den henter e asunto cu a surgi rond di e proyecto di Race Track despues cu a keda divulga cu e proyecto aki a bay Curacao, awe ta participa na nos pueblo cu coalicion OLA/AVP lo haci su maximo esfuerzo pa trece e proyecto aki bek pa Aruba.

E ta un proyecto cu den tur su aspectonan lo resulta e proyecto catalisador di e economia pa San Nicolas y diversificacion pa nos turismo.

Aruba a perde e proyecto aki pa motibo di postura di gremionan, ambientalistanan y MEP. un partido cu no ta desea nada drechi ni bon pa Aruba.

Ademas e oferta cu Curacao a brinda e inversionistanan ta mucho mas atractivo, pero despues di un consulta entre ambos partido e compromiso pa cu e proyecto aki a keda un biaha mas constata.

Partido OLA y AVP a mira e importancia di e proyecto aki pa e pueblo di San Nicolas y Aruba.

Ambos partido ta comprometi pa duna San Nicolas e desaroy cu e merece y e plan total di OLA pa San Nicolas ta encera tambe un hospital y un station di bus nobo.

Tres proyecto cu lo completa otro den tur nan facettanan.

Lider di OLA ta orguyoso di por haci un anuncio di e

indole aki unda un biaha mas ta keda demostra cu partidonan OLA y AVP ta e unico partidonan cu tin e desaroyio y progreso economico di San Nicolas na pecho.

